

दिनांक 10.01.2025

समय: 18.50 बजे

आकाशवाणी जयपुर-अजमेर

प्रादेशिक समाचार

- मुख्यमंत्री भजन लाल शर्मा बाड़मेर मांय मंगला प्रोसेसिंग टर्मिनल अर बालोतरा मांय रिफाइनरी रो जायजो लीनो।
- रेल मंत्री अश्विनी वैष्णव कह्यो— जनता रा सुबीता सारू बेगी ई नुवी अमृत भारत रेलगाड़ियां सरू करी जावेला।
- वन मंत्री संजय शर्मा कह्यो—रूखड़ा री गैर कानूनी कटाई माथे करड़ाई ऊं रोक लगायी जावेला।
- अजमेर मांय ख्वाजा साहब रो सालाना उर्स पूरो व्ह्यो।

000

मुख्यमंत्री भजन लाल शर्मा आज बाड़मेर अर बालोतरा जिलां रो दौरा कीनो। श्री शर्मा बाड़मेर रा नागाणा मांय मंगला प्रोसेसिंग टर्मिनल जा र वठे रा काम—काज रा बारा मांय जाणकारी लीनी। इण ऊं पैली मुख्यमंत्री बालोतरा मांय तेल रिफाइनरी रा काम रो जायजो लीनो अर नाइट्रोजन प्लांट रो उद्घाटन कीनो। वे रिफाइनरी रा अहलकारां सागे मीटिंग कर र रिफाइनरी रा काम रा बारा मांय ई जाणकारी लीनी।

000

जैसलमेर मांय आज मुख्यमंत्री सद्भावना केन्द्र री सरूआत करी ज्यी। ई केन्द्र रे मार्फत नगर परिषद री ओर ऊं जनता अर संस्थानां कानी ऊं दान करी ज्यो सामान जरूरतमंद लोगां ने दिया जावेला। केन्द्र रा उद्घाटन रे मौके समाज सेवा करण वाळां री ओर ऊं गर्म कपड़ा अर कम्बल दान करी ज्यो। सद्भावना केन्द्र माथे किताबां अर खिलौना समेत दूजी चीजां ई ली जावेला। मुख्यमंत्री भजन लाल शर्मा हाल ही मांय जनता ऊं ई बाबत अपील ई कीनी ही।

.....

000

जनता ने आवण जावण रो ओर सुबीतो देवण रा मकसद ऊं बेगी ई नुवी अमृत भारत रेलगाड़ियां चलायी जावेला। रेल मंत्री अश्विनी वैष्णव आज चेन्नई मांय खबरनवीसां सागे बातचीत रे दौरान आ जाणकारी दीनी। श्री वैष्णव कह्यो के आं गाड़ियां मांय बेहतर क्वालिटी वाळा सुबीता मुहैया कराया जावेला।

.....

000

राष्ट्रपति द्रौपदी मुर्मू कह्यो है के प्रवासी भारतीय दुनिया सामी भारत री सही तस्वीर पेश करे है। वे आज भुवनेश्वर मांय 18वां प्रवासी भारतीय दिवस सम्मेलन रा समापन जळसा मांय बोल रही ही। राष्ट्रपति कह्यो के भारत रा प्रवासी लोग ईलाज अर प्रौद्योगिकी समेत केई हलकां मांय चोखो काम कीनो है। राष्ट्रपति न्यारा—न्यारा हलका मांय चोखो काम करण वाळा भारत रा प्रवासियां ने प्रवासी भारतीय सम्मान दे र ई नवाजा।

000

प्रधानमंत्री नरेन्द्र मोदी कह्यो है के सियासत मांय कामयाब व्हेवण सारू समर्पण, प्रतिबद्धता, अर चोखा टीम खिलाड़ी रा गुण व्हेवणा चाहिजे अर वां ने हमेशा लोगां रा काम करण सारू तैयार रहवणो चाहिजे। प्रधानमंत्री नामी कारोबारी निखिल कामथ सागे बातचीत रे दौरान अ विचार बताया। श्री मोदी कह्यो के चोखा लोगां ने लगातार सियासत मांय आवणा चाहिजे अर वां ने केवल महत्वाकांक्षा सारू नी बल्कि मिशन सागे ऐड़ो करणो चाहिजे। करीब दो घंटा रा इन्टरव्यू मांय श्री मोदी वां री जीवन यात्रा, भणार्ई-लिखाई, राजनीतिक करियर, प्रबंधन कौशल अर दूजा मुद्दा माथे चर्चा कीनी।

000

अजमेर, भरतपुर अर बीकानेर रा इंजीनियरिंग कॉलेजां सारू 300 करोड़ रुपया रा बजट रो प्रावधान करी ज्यो है। उपमुख्यमंत्री डॉ. प्रेमचंद बैरवा आज जोधपुर मांय भारतीय राष्ट्रीय शैक्षणिक महासंघ राजस्थान रा 63 वां वार्षिक अधिवेशन मांय आ जाणकारी दीनी। वे कह्यो के शिक्षकां री समस्यावां दूर करण माथे सरकार खास ध्यान दे रही है अर न्यारा-न्यारा रीता ओहदा माथे भर्तियां रो काम चाल रह्यो है। उपमुख्यमंत्री शिक्षकां ऊं राष्ट्रीय शिक्षा नीति ने असरदार तरीका ऊं लागू करण री अपील कीनी। कार्यक्रम मांय केन्द्रीय कृषि अर किसान कल्याण राज्यमंत्री भागीरथ चौधरी कह्यो के भणार्ई लिखाई रा हलकां माथे खास ध्यान देवणो जरूरी है।

000

वन मंत्री संजय शर्मा कह्यो है के रूखड़ां री गैर कानूनी कटाई माथे करड़ाई ऊं रोक लगायी जावेला। श्री शर्मा आज भीलवाड़ा मांय हरित मेळा रा उद्घाटन पाछे खबरनवीसां सागे बातचीत करता थकां आ जाणकारी दीनी। वे कह्यो के गैर कानूनी खनन रोकण सारू ई जरूरी कोशिशों करी जा रही है। वन मंत्री कह्यो के जंगली जिनावरां रो शिकार रोकण सारू ई करड़ी कार्यवाही करी जावेला।

.....

000

झुंझुनू जिला रा सरकारी अस्पतालां मांय जापा री तादाद मांय बधोतरी व्ही है। म्हाणा खबरनवीस बतायो के लारला साल झुंझुनू, मलसीसर, बुहाना, मंडावा अर सूरजगढ़ ब्लॉक रा सरकारी अस्पतालां मांय गैर-सरकारी अस्पतालां री तुलना मांय बत्ता जापा करायी ज्यो।

.....

000

आज विश्व हिन्दी दिवस है। दुनिया मांय हिन्दी भाषा रा प्रचार-प्रसाररा मकसद ऊं ओ दिन मनायो जावे है। पेश है एक रपट—

.....

मुख्यमंत्री भजनलाल शर्मा ई विश्व हिन्दी दिवस रे मौके शुभकामना संदेश मांय कह्यो के सगळां ने दुनिया भर मांय हिन्दी भाषा रा प्रचार-प्रसार सारू काम करणो चाहिजे।

000

अजमेर मांय सूफी संत ख्वाजा मोइनुद्दीन हसन चिश्ती रो सालाना उर्स आज पूरो व्हे ग्यो। ई सागे ई जायरीन पाछा जावण लाग्या है। पेश है म्हाणी खबरनवीस री रपट—

.....

000

बीकानेर मांय अन्तर्राष्ट्रीय ऊंट उत्सव आज हैरिटेज वॉक सागे सरू व्ह्यो। इण मांय सजा-धजा ऊंट अर बद्धियां ई शामिल हा। तीन दिन रा ई उत्सव रा तैत काल राष्ट्रीय उष्ट्र अनुसंधान केन्द्र मांय ऊंटों री न्यारी-न्यारी होड़ां राखी जावेला।

दूजी कानी राजधानी जयपुर मांय अल्बर्ट हॉल सामी पर्यटन विभाग री ओर ऊं आज अर काल कल्चरल डायरीज सांस्कृतिक संध्या राखी जा रही है। ई रा तैत रश्मी रथी नाटक खेल्यो जा रह्यो है।

000

प्रदेश मांय केई ठौड़ां जोरदार ठारी पड़ रही है। मौसम विभाग रे मुजब आज सिरौही जिला रा माउंट आबू मांय न्यूनतम तापमान 2 डिग्री सेल्सियस दर्ज करी ज्यो। दौसा, करौली, सीकर जिला रा फतेहपुर अर हनुमानगढ़ जिला रा संगरिया मांय शीतलहर रो असर रह्यो। चूरू, अर श्रीगंगानगर मांय ई पारो 6 डिग्री सेल्सियस ऊं नीचे रह्यो। हनुमानगढ़ अर भरतपुर मांय संवारे मोड़ा ताई घणी धुंअर रही। मौसम महकमा रे मुजब बीकानेर, जयपुर अर भरतपुर संभाग रा कुछ हलकां मांय काल हल्की बारिश व्हेवण अर कटे-कटे ओला पड़बा रा आसार है।

000

जयपुर हेरिटेज नगर निगम री ओर ऊं आज 'स्वच्छता पतंग महोत्सव 2025' राखी ज्यो। महापौर कुसुम यादव पतंग उड़ा र साफ-सफाई राखण रो संदेश दीनो। ई मौके जयपुर हेरिटेज नगर निगम री ब्रांड एंबेसडर गौरी माहेश्वरी कपड़ा रा थैला काम लेवण रा अभियान री सरूआत कीनी।

ई मौके सैलानियां ने कपड़ा रा थैला अर पतंगां दीरीजी। ई मौके महापौर जनता ऊं साफ-सफाई राखण अर पर्यावरण ने बचावण ऊं जुडी आदाता अपणावण री अपील कीनी।

000

उदयपुर मांय आज महिला अर बाल विकास मंत्रालय री ऊं राखी ज्यो चिन्तन शिविर सरू व्ह्यो। तीन दिन रा ई शिविर रो केंद्रीय महिला अर बाल विकास मंत्री अन्नपूर्णा देवी काल औपचारिक उद्घाटन करेला। इण मांय सिरकत करण सारू देश भर ऊं न्यारा-न्यारा महिला अर बाल विकास मंत्री, सचिव अर आला अहलकार उदयपुर पधार्या है। शिविर मांय महिलावां अर बच्चां रा पूरा विकास अर भला ऊं जुड़्या मुद्दां माथे राज्यां अर केन्द्र रा राज वाळा प्रदेशां रा नुमाइन्दा सागे चर्चा करी जावेला। शिविर मांय महिला अर बाल विकास मंत्रालय रा प्रमुख कार्यक्रम मिशन वात्सल्य, शक्ति, पोषण अर सक्षम आंगनबाड़ी मिशन रा बारा मांय सत्र राख्या जावेला।

000